

Aleksandar Hemon: Neke će biti sramota što su bili na strani Naroda i pravde



Narod i pravda, stranka na čijem čelu se nalazi Elmedin Konaković, predsjednik Skupštine Kantona Sarajevo, danas je pozvala na otkazivanje Povorka ponosa koja je zakazana za septembar ove godine. To bi trebala biti prva povorka u BiH, a održaće se pod sloganom "Ima izać". Cilj joj je da LGBT osobe javno skrenu pažnju na ljudska prava koja su im često uskraćena.

– Zalažemo se za vladavinu prava, toleranciju i suživot svih različitosti, ali se protivimo organizovanju manifestacija koje neće popraviti, već mogu pogoršati ukupnu sigurnosnu situaciju u Sarajevu i šire. Ne negirajući prava svakog pojedinca na slobodu u svakom smislu, pozivamo organizatore povorke da vode računa o činjenici kako je velika većina građana Sarajeva protiv povorke, jer su u suprotnosti s tradicionalnim vrijednostima i njihovim vjerskim osjećanjima. Pozivamo organizatore povorke da vode računa i o činjenici da je sloboda čovjeka ograničena slobodom i pravima drugog čovjeka, kazao Ibrahim Kerla, član rukovodstva Naroda i pravde.

Stepen napretka nekog društva najbolje se mjeri odnosom većine prema manjini, prema najslabijima i ugroženima. Takve su zasigurno LGBT osobe.

Na ovaj poziv NiP-a reagovao je pisac Aleksandar Hemon putem Twittera, gdje je pozvao Vladu, u kojoj učestvuje i NiP, da zaštiti LGBT građane koji će izaći na ulice Sarajeva.

– Povorka ponosa u Sarajevu je trebalo davno da se desi. Ako je društveno uređenje u BiH demokratija, LGBT građani imaju neupitno pravo na postojanje i izražavanje u javnom prostoru. Vlada ih mora zaštititi. Povorka doprinosi kompleksnosti bosanskog društva. Svi građani koji misle da je Sarajevo dobar i otvoren grad, kao i oni koji vjeruju da je otpor svakom obliku fašizma dužnost svakog dobrog čovjeka moraju podržati Povorku svojim prisustvom, a onda raditi na tome da se LGBT građani zaštite od diskriminacije i nasilja. Uslovi za Povorku nikada neće biti idealni dok se Povorka ne desi. Povorka je neophodna i neizbježna da bi se vidjelo da u tom tzv. kompleksnom društvu postoje kompleksni građani čija je sloboda ograničena jer bi

neki da se nastave praviti da LGBT građani ne postoje. Zahtjevi za otkazivanje Povorka samo ukazuju na to koliko je Povorka neophodna. Isto tako pokazuju političku nesposobnost stranaka koji bi da je nema. Umjesto da pokušaju da podrže i integrišu LGBT građane kao javne političke subjekte, oni bi da ih ne bude. Jedini ispravni moralni i i politički stav u odnosu na Povorku je bezuslovna podrška. Sve ostalo je sabotaza, kukavičluk i mržnja, prikrivena, a i otvorena. Homofobija je nasilje i diskriminacija te je tako sramotna. Promjena koja će omogućiti puno prisustvo LGBT građana u javnom prostoru je skora i neizbježna. Neki će uskoro biti ponosni što su podržali pravdu i ponos, a neke će biti sramota što su bili na strani Naroda i pravde, konstatovao je Hemon.

Date: 23-08-2019